

諸子平議補錄卷八十二



諸子平議補錄卷八

錄曲園雜纂

德清俞樾

潛夫論

士欲宣其義必先讀其智

讚學

樾謹按詩牆有茨篇不可讀也毛傳曰讀抽也方言曰抽讀也蓋讀與抽聲近而義通讀其智卽抽其智謂士欲宣明其義必先抽引其智也羣書治要改作必先讀其書此不達其義而臆改不可從也

箕子陳六極國風歌北門故所謂不憂貧也豈好貧而弗之憂邪蓋志有所專昭其重也

樾謹按箕子陳六極國風歌北門非不憂貧之謂故
所謂不憂貧也當作何故謂不憂貧也蓋承上文引
孔子君子憂道不憂貧句而言箕子陳六極國風歌
北門古人未嘗不以貧爲憂何故而言憂道不憂貧
邪乃反言以起下文今作故所謂則於義不可通矣
或以喪亂箕其年歲

樾謹按箕與綦通荀子王霸篇曰欲綦色耳欲綦聲
楊倞注曰綦極也字亦通作期議兵篇已箕三年然
後民可信也宥坐篇綦三年而百姓往矣兩篇文義
正同是箕與期通也或以喪亂箕其年歲言窮極其

年歲也汪氏繼培箋云暮疑稽之誤非是

水師泛軸解維則溺自託舟楫坐濟江河

樾謹按汪箋云軸當作舳謂舳艫也說文云漢律名
船方長爲舳艫如此則舳卽舟楫矣軸當仍讀車軸
之本字蓋車軸不可以濟水故一解其維卽沈溺也
入學則不亂得義則忠孝

務本

樾謹按上云民富乃可教學正乃得義此承上文而
言當作可教則不亂古學字作斲故教學字相近易
誤教誤作學因臆改爲入學耳

故衰闇之世本末之人未必賢不肖也禍福之所

下有脫字

勢不得無然耳

樾謹按人字乃失字之誤賢字乃皆字之誤言衰闇之世本末之所以失者未必皆不肖之故乃爲禍福所迫不得不然也

夫令譽從我興而二命自天降之

論榮

樾謹按上文云寵位不足以尊我而卑賤不足以卑已然則二命卽謂此二者也下云故君子未必富貴小人未必貧賤富貴貧賤此卽天所降之二命汪氏不本上下文爲說而泛舉援神契之遭命隨命以說此二命失之

中堂生負苞

樾謹按中堂當作中唐詩防有鵲巢篇中唐有璧傳
曰中中庭也唐堂塗也此卽用其語負當作蓺說文
艸部蓺王蓺也苞艸也南陽以爲麤履蓺苞二草下
文山野生蘭芷蘭芷亦二草也汪箋引王君說云苞
當爲芻爾雅曰蓺王芻是也古者多云負芻按爾雅
釋草荼王芻不云蓺王芻王說殊誤至春秋有曹伯
負芻史記有楚王負芻孟子云昔沈猶有負芻之禍
趙注云時有作亂者曰負芻則負芻自是人名不可
以說此也

虞舜之所以放殛子胥之所以被誅

賢難

樾謹按虞舜放殛卽指蒼梧之崩其意謂舜德衰爲禹所放故遠狩蒼梧而死卽劉知幾疑經惑古之見也史通所引囚堯偃朱諸說皆出汲冢乃王符已有此言則此說相傳漢世已有之矣汪箋引完廩浚井以證放殛事恐非其旨

或爵侯伯或位公卿尹據天官東在帝心

樾謹按尹據天官句尹字無義疑尸字之誤書序康王旣尸天子遂誥諸侯此用尸字卽本書序文也明闇篇尹其職而策不出於己尹字亦當作尸

隔損疏賤而信趙高

明閻

樾謹按損字無義汪箋改作捐然隔之與捐義亦不
倫疑當作限隔限二字文義相屬思賢篇曰限隔九
州此云隔限彼云限隔其義一也限與損字形微似
因而致誤

陳湯殺郅支而匡衡抹其功

樾謹按抹字無義汪箋據羣書治要改作按字義亦
迂曲疑本是佼字淮南子覽冥篇鳳凰之翔至德也
雷霆不作風雨不興川谷不澹草木不搖而燕雀佼
之以爲不能與之爭於宇宙之間佼蓋輕慢之意上

文云赤螭青虬之游冀州也蛇鰋輕之以爲不能與之爭於江海之中一云輕之一云佼之是佼與輕同佼其功卽輕其功也按乃佼之誤掾又按之誤耳皆當考治以効實爲王休者也

考績

機謹按此言自守相令長至三公皆當考績以効實而進退之賢則任用不賢則罷斥王休二字借用五行王相休囚之說亦因上文言三公典和陰陽故卽從陰陽五行爲說也淮南子地形篇木壯水老火生金囚土死無王休之文大元元數篇五行用事者王王所生相故王廢勝王囚王所勝死其文有王無休

然論衡難歲篇云立春艮王震相巽胎離沒坤死兌
囚乾廢坎休則東漢時固已有此說自王而相而胎
而沒而死而囚而廢而休此文卽用王休二字以
寓進賢退不肖之意注箋引詩對揚王休釋之未得
其義相列篇五色之見王廢有時彼云王廢此云王
休其義一也

夫聖人爲天口賢人爲聖譯

樾謹按說文言部譯傳譯四夷之言者天無言而聖
人代之言故曰爲天口聖人之言人不易曉而賢者
爲通其指趣故曰爲聖譯周易序官象胥疏曰譯卽

易謂換易言語使相解也譯字不誤汪箋云疑當作
鐸非是

是故養壽之士先病服藥養世之君先亂任賢是以身
常安而國永永也

思賢

樾謹按汪箋云兩永字有誤程本作國脈永疑非是
上永字不誤下永字乃禾之誤禾古文保字見說文
身常安而國永保兩文相對

人君求賢下應以鄙與直不以枉

樾謹按與讀爲舉古字通用周官師氏職王舉則從
故書舉爲與是其證也與直卽舉直也不字乃下字

之誤以字上又脫應字當作與直下應以枉與上句求賢下應以鄙相對成義

己不引真受猥官之

樾謹按引字乃別字之誤己不別真受猥官之與上文說治疾曰己不識真合而服之文義一律受猥官之四字亦疑有誤但莫可訂正耳又按上文己不識真句衍而字當從王說刪

令結怨於下民縣罪於惡積過既成豈有不顛隕者哉樾謹按縣罪於下脫二字當與上結怨於下民相對成文惡下脫既字惡既積過既成亦相對成文

已又定矣還至讒如臣妾之飾僞言而作辭也則君王
失已心而人物喪我體矣

潛歎

樾謹按汪箋云如疑當作妬屬上讀作妬是也屬上
讀非也還乃還字之誤方言廣雅竝曰還及也還至
猶云及至葢承上言好之與惡鹿之與馬本屬易辨
已又先有定見及至讒妬之臣妾飾言則又爲之奪
也自還至至辭也十四字作一句讀不當於妬字絕
句

人君內秉伐賢之斧權噬賢之狗而外招賢

樾謹按權字無義當作囓廣韵二十九換云喚呼也

嚙上同然則嚙卽喚字猶云呼噬賢之狗耳

油潰入海連淮逆河

浮侈

樾謹按油潰疑當作潰油傳寫誤倒也油水名說文水部云油水出武陵孱陵西東南入江潰卽西都賦潰渭洞河之潰章懷後漢書注引倉頡篇曰潰傍決也潰油入海蓋從油水入江而由江入海也大木之所出多在楚蜀運木者必取道荆襄江表傳稱劉備爲荊州牧立營油口此卽古油水故道謂之油口則其爲往來之所經歷可知潰油倒作油潰遂失其意汪箋云油當作漕非也

是故求馬問馬求驢問驢求鷹問鷹求駝問駝實貢

樾謹按鷹字不倫駝則仍卽馬之一種上旣言馬不應下又言駝疑皆字之誤鷹當作雞雞誤爲雍因改爲鷹矣駝當作龙謂犬也涉上驢字而加馬旁耳求馬問馬求驢問驢馬驢一類也求雞問雞求龙問龙雞犬一類也

有司奏事又俗以赦前之微過妨今日之顯舉述赦

樾謹按汪箋曰俗疑欲作欲是也惟欲上當補不字蓋赦前之事不得復奏故不欲以赦前之微過妨今日之顯舉也無不字則義不可通

旦夫列侯皆國大臣也雖身在外而心在王室宜助聰明與智賢愚以佐天子

三式

樾謹按愚字衍文也與讀爲舉古字通用言宜舉智賢之人以佐天子也下文云當循王制皆使貢士可證其義

法令鬻而役賦繁則希民困於吏政仕者窮於典禮

愛日

樾謹按希民二字無義疑當作布衣以布衣與仕者對舉猶慎微篇云人君聞此可以悚息布衣聞此可以改容以布衣與人君對舉也慎微篇又云由此言

之有希人君其行一也汪箋云有希當作布衣漢碑布作帑與此相似然則此篇布字亦因作帑而誤作希可知矣衣與民下半亦微似

故先慎已喉舌以元示民

斷訟

樾謹按汪箋本如此其說云喉舊作唯元當爲玄德之玄唯作喉是也讀元爲玄則非是汪又引荀子上周密則下疑玄如此又讀玄爲眩與前說歧異而義益不通矣汪所據者元刻本而漢魏叢書本作以示小民今鄂局本從之文義明白不必徇元本之譌曲爲之說